

COL -

Kolosə tián

Sagi tə, Polə nə púpúní v pa

Kolosə tián

Kərisə lià tə nə

Kolosə tián sagi tə yuu wa sugu

Lìu tə, v nə púpúní sagi ku tə

Ku yi *tuntunu Polə nə púpúní ku. Máná tə, v nə púpúní sagi ku tə, də v yi v wulə bán diè Romə nə.

Lìà tə nə, Polə nə púpúní

Polə púpúní sagi ku tə, v pa *Kərisə lià tə nə, ba nə wulə Kolosə nə.

Sagi tə wa sugu

Nəŋə ku tə yiri Polə nə púpúní ba nə: Lià duən kàrì kunkun kàrì, ba ma gıgarı *Kərisə lià tə Kolosə nə. Ba pià, sə Kərisə lià tə pìí ba twá ba nıbara-ba yofwamınan tə nə. Polə pià v bırı də, Kərisə tə, v nə wulə mu wa, nə dwə won mama. U mù cııı nə jə nii, v ga jə diàn luu diàn mama yuu wa.

Kərisə lià púlí tə yi ndə v yira nə, v tətə ga yi yira təntə yuu. Kərisə lià tə nə kən ba waa Kərisə nə yiri, ba mù də Kərisə tə, v nə tıga, v pìí v bwin, tə dān vwə duən nə. Ba yáá lə ba níá wa, ku twá də Yu yiri, ba ma bırı ku yoo təntə. Mə ku twá yoo ku tə nə Kərisə lià tə ma bırı ku. Ku nətu dān pin ba jì ləzwəndura.

1

Polə jònì Kərisə lià tə Kolosə nə

¹ À mù Polə yì Yu nə kúrí nə, də v tətə fira, sə à ya Zwezi-*Kərisə *tuntuv. À mù də Timote, v nə yì nə nubiu Kərisə yiri, nə púpúní sagi ku tə. ² Nə pín ku Kərisə lià púlí tə nə, ku nə wulə Kolosə nə. Á mù nə yì nə nubia á nə yì Kərisə nə ti, á nə keni á waa Zwezi-Kərisə nə wuuu də pùé nədú. Nə nyina Yu nə wá fwa pubwanv á yira, v ga pa aba bican sié.

Polə ken Yu lèè Kolosə tián yiri

(Efəzə tián 1.15-19, Filipə tián 1.3-6, 1 Tesalonikə tián 1.2-4, 3.5-11)

³ Máná mama, nə jònì Yu, v nə yì nə *Yuu-Tiu Zwezi-*Kərisə nyina, nə pín aba. Nə nə wulə nə jònì Yu nə pín aba, nə yàá kə v lèè á yiri. ⁴ Nə nì, nətú tə á nə kəni á waa Zwezi-Kərisə nə wuuu, yá á ga tə swə lià tə mama, ba nə yì Kərisə nə ti. ⁵ Máná tə, Zwezi-Kərisə suywánú tə, ku nə yì cígá sugv tə, nə twi á con, ku pín á jə yala Yu con. Yala təntə yì won tə, Yu nə taní, sə v pa aba v sàń nə. ⁶ Ku suywánú təntə vèli ku yí luv tə mama wa, ku ga tə pùlì ku sùrí wuuu. Mə nətú nə, ku tɔŋa á də con, ku nə zɔgi dɔn tə nə, á nə nì Yu pubwanv tə yoo, á ga lwarí, Yu pubwanv tə nə yì cígá cígá nətú. ⁷ Ku yì Epafərasə nə kàrì ku suywánú təntə, v bɔrɪ aba. U yì nə nubiswənə. Nə mù də v mù mɛ nə tɔŋa Yuu-Tiu Zwezi-Kərisə tutvɔŋi tə duən nə. U tɔŋa v pín Zwezi-Kərisə nə də pùé nədú, á mù yuu yiri. ⁸ Yá v mù dàń nə swìn, v pa nə yəni nətú, Yu-*Siŋu tə nə pín á swə duən.

(Filipə tián 1.9-11, Zwan 1.1-3, 14, 16)

⁹ Ku mù nə pín, ku nə zɔgi dɔn tə, nə nə nì ku nətú tə, nə yàá jònì Yu nə pín aba máná mama. Yá nə dàń lòrì Yu, sə v pa á yəni ku tə nə yì v fira, tə zəni zəni, sə v ga pa á na wubɔŋa mama, də yənu mama, ku nə yì v *Siŋu tə nə pín. ¹⁰ Ku nətú wá pa, á wàní á twá ku tə nə *Yuu-Tiu nə pìà, á ga

tunja ku tɛ nɛ poli v pùé nɛ. Á dǎn wá tun tutunzɛnɛ yiri mama, á ga wá lwari Yu wuuu, á sùrí lá. ¹¹ Nɛ tɛ lòrì Yu, sɛ v twá v diàn tɛ nɛ biri v dun tɛ nɛ, v pa aba diàn. Yá á dǎn wá wàní á na pínú wuuu, á dànà ká pìí á kɛ á kwa. ¹² Á kɛnɛ nɛ nyina Yu lèè dɛ pupwɛn. U pin á jì là tɛ, á dɛ nɛ wàá tori á nɛ v con, v nɛ tún, sɛ v pa là tɛ nɛ, ba nɛ yɪ v mù nɛ tɪ, bwálí tɛ nɛ, ku nɛ wulɛ poni wa. ¹³ U mù nɛ van nɛba v lɪ, sɛ yikunu yìèn dǎn ká dɛ diàn nɛ yuu wa. U dǎn ken nɛba v bìú Zwezi-Kərisə, v nɛ swə, pàrì tɛ wa. ¹⁴ Mɛ v bìú tɛntɛ nɛ kwɛn nɛ cuna tɛ v lɪ nɛ mù dɛ Yu pwéré wa. Yá v mù ga nɛ yè nɛba v jon, sɛ nɛ tɪnɪ nɛ tiàn.

Zwezi-Kərisə yɪ won mama Yuu-Tiu

(Efɛzə tiàn 2.13-19)

¹⁵ Zwezi-**Kərisə* yɪ Yu tɛ, là nɛ wàrì ba nɛ ba yíá wa, nyinyiga. U mù nɛ yɪ Yu bìú. U yin lá dɛ won mama tɛ wà fwa. ¹⁶ Yá Yu yɪ v twá dɛ v mù, v ma fwa wièn tɛ mama, tɛ nɛ wulɛ lanworu wa dɛ tia yuu wa. Tɛ wièn tɛntɛ nɛ yɪ wièn tɛ, là nɛ na dɛ ba yíá, dɛ tɛ tɛ, ba nɛ ba na dɛ yíá. U fwa **malikɛ* dɛ tɛ yun tiàn, dɛ pègá tɛ mama, diàn tɛ, dɛ wièn tɛ nɛ jɛ diàn, dɛ wièn tɛ nɛ dɛ pàrì. Tɛ wièn tɛntɛ mama yɪ Yu twá dɛ v bìú tɛ, v ma fwa tɛ. Yá tɛ ga yɪ Yu fwa, v pa Zwezi nɛ. ¹⁷ Zwezi-Kərisə yà wulɛ, dɛ won mama tɛ tɛlɔ́. Yá wièn tɛ mama dǎn yɪ, v mù nɛ pin, tɛ wulɛ tɛ bwálí nɛ. ¹⁸ Kərisə là púlí tɛ yɪ ndɛ v mù Kərisə yira nɛ, v tɛtɛ dǎn ga yɪ yira tɛntɛ yuu. U mù nɛ yɪ tɛntɛn liù, v nɛ nan, v mù ga nɛ dí yáá, v bwin v zàn tian wa. Ku dǎn biri dɛ, v wulɛ wièn tɛ mama yuu wa. ¹⁹ Ku yɪ Yu tɛtɛ fira, sɛ v bìú tɛ ya ku tɛ mama míámíán, v mù Yu nɛ yɪ. ²⁰ U mù Yu nɛ kúbə swə, sɛ v twá v bìú tɛ nɛ, v pa v dɛ won mama pìí ba kɛ duən yuu. U twá dɛ v bìú tɛ jana, tɛ nɛ nan v tian tɛ mǎngá wa dagarv tɛ yuu wa, v ma kɛ bican sié v mù, dɛ tia yuu wièn tɛ, dɛ lanworu wièn tɛ mama pwéré wa.

²¹ Á dɛ con dí yáá nɛ, á yà núná dɛ Yu. Yá á yà yɪ Yu duɛa, á nɛ buɛa

yokukwinan, á ga tunja tɛ yokukwinan tɛntɛ yiri. ²² Yá síún nɛ, Yu dǎn pin, á mù dɛ v mù pìí á kɛ duɛn yuu, v bìú tɛ nɛ jigɛ lɛzwɛnɛ v ga ti tɛ yiri. Yu fwa nɛtu, sɛ v pa á wǎní á bà, á zígí v yáá con, ndɛ lià tɛ nɛ, cuna mama nɛ tɛlɛ á yuu wa, yokukwinan dǎn ká ya á yira Yu yáá con, liù mama nɛ wàrì yolwan v swìn á yuu wa. ²³ Á dǎn nɛ mɛ, sɛ á kɛ á waa Zwezi-Kərisə nɛ wuuu, á dǎnà ká yá. Á zígá dɛ diàn ku wa. Á dǎnà ká pìí á lwǎn pubuɲa dɛ yala tɛ, á nɛ jɛ dɛ Zwezi-Kərisə suywǎǵú tɛntɛ, ba nɛ swìn ba biri aba. Yá ba swìn ku ba biri tia yuu lɛzoni tɛ mama. Mɛ ku suywǎǵú tɛntɛ ka swìn ka biri nɛ yi à mù Polɛ dɛ tutuɲi.

Nɛtu Polɛ nɛ tunja Kərisə lià púlí tɛ yiri

(Efɛzə tiàn 3.1-13, 1 Korɛntɛ tiàn 2.7-13)

²⁴ À mù Polɛ jɛ pupwɛn dɛ cǎn tɛ, à nɛ dɔ á mù yiri, mǎǵá ka tɛ wa. À wulɛ à dɔ cǎn tɛ, tɛ nɛ ga, sɛ nɛ dɔ Zwezi-*Kərisə tutuɲi tɛ yiri, sɛ ku san v púlí tɛ nɛ, ku nɛ yi ndɛ v yira nɛ. ²⁵ À jigɛ Kərisə lià púlí tɛ tutuɲu, sɛ à tun tutuɲi tɛ, Yu nɛ pin nɛ. Tutuɲi tɛntɛ nɛ yi, sɛ à swìn v sugu tɛ mama à biri aba. ²⁶ Sugu tɛntɛ yi cígá tɛ, ka nɛ sègè lià tɛ mama yáá nɛ, ku mǎǵá nɛ ba yigɛ. Yá síún nɛ, v dǎn biri ku lià tɛ nɛ, ba nɛ yi Kərisə nɛ ti. ²⁷ U fwa nɛtu, v yà nɛ pià v biri lià tɛntɛ nɛ dɛ, yosɛgu tɛntɛ, v nɛ pià, sɛ v fwa yi yoo nɛfaru. Yá v ga wá san dwíé tɛ duɛn tɛ mama nɛ, ba nɛ tà *Zwifə-ba. Cígá tɛntɛ, ka nɛ sègè nɛ yi Zwezi-Kərisə yoo wulɛ á bicaní wa. Yá á dǎn twá dɛ v mù, á jɛ yala dɛ, á wá na tori Yu dun tɛ wa. ²⁸ Mɛ v mù Zwezi-Kərisə yoo nɛ, nɛ swìn nɛ biri lià tɛ nɛ. Nɛ yáá kwè liù mama, nɛ ga kàrì wá dɛ wubɲa tɛ mama, Yu nɛ pin nɛba. Nɛ pià, sɛ lià tɛ mama twá Zwezi-Kərisə nɛ, ba ya lià tɛ, Yu yìèn tɛ bɪga ba yun wa. ²⁹ Ku mù nɛ pin, à dǎn ma kəni diàn zənzən à tunja. Yá ku yi Zwezi-Kərisə diàn nɛfaru tɛ, v nɛ pin nɛ, dǎn nɛ pin, à jɛ diàn, à ma tunja nɛtu.

2

¹ Ku yi cígá, à pià, sə á lwarí, à nə tun zənzən nətu, à pa á mù Kolosə Kərisə lià tə nə, də ba tə nə, ba nə wulə Lawodise nə, də lià duən zənzən nə, ba tə nə wà nə nɪ ba yíá wa. ² À fwa nətu, sə à ma zùrì Kərisə lià tə mama bɪcanɪ, sə ba vwa duən nə, ba ga sóní duən. À pià, sə á na yənu tə mama míámíán. Ku nətu dàń wá pa á lwarí Yu cígá tə, ka nə sègè. Cígá təntə, ka nə sègè, nə yi Zwezi-Kərisə yoo tə. ³ Wubuŋa də yənu yi wiən, tə nə ziən zənzən, tə ga yi yosəgu Zwezi-Kərisə bɪrɪ nəba. ⁴ À swɪn yìèn tə tə á con, sə liù mama dàń ká wàní v twá swɪan sùràn nə, v ma gɪgarɪ aba v dugu. ⁵ À mù nə swə à ŋúná də aba, à pubuŋa tə wulə də aba. À fwa pupwən də, á nə tuŋa yoo mama, ndə ku nə mɛ, sə ku tun nətu, á ga kəni á waa Zwezi-Kərisə nə wuuu, á ba á kwa keni.

Zwezi-Kərisə yi nə wubuŋa cígá cígá

(Efɛzə tián 2.1-10, 3.14-19, 1 Tɛsalonikə tián 4.1-2, 1 Timote 6.20-21, Romə tián 6.3-11)

⁶ Á sè, sə Zwezi-*Kərisə ya á *Yuu-Tiu. Ku mù tə yɪrɪ, ku dàń mɛ, sə á ya də wá. ⁷ Á dàń yana də wá, ndə tiù ŋunan nə zua tia dèń nətu. Á zɪga diàn, á ma kə á waa v nə wuuu, ndə ba nə kàrì aba nətu. Á kənə Yu lèè zənzən mánjá mama. ⁸ Á cia á tiàn nə, á dàná ká pa liù gɪgarɪ aba, v dugu də yíá swɪan sùràn, tə nə ba dèń jə. Swɪan sùràn təntə yi tə nan ləzoni yofwamɪnan wa, də luv wiən, tə nə jə diàn nə yuu wa, ku tà Zwezi-Kərisə con tə nan. ⁹ Ku tə mama míámíán Yu nə yi, mə ku mù nə Zwezi-Kərisə də yi. ¹⁰ Yá á mù də Zwezi-Kərisə dàń nə vwə duən nə tə pɪn, á də jə wiən tə mama míámíán, tə nə wulə v con. U mù nə wulə wiən tə mama yuu wa, tə nə dé pàrì ləzoni yuu wa.

¹¹ Á də Zwezi-Kərisə nə vwə duən nə tə pɪn, v li á yokukwɪnan tə mama,

sə tə kùbè dàn ká ja diàn á yuu wa. U nə kwen aba nətu tə, yi ndə bara *goŋu nə. Yá ku dàn nə tà ndə ləzoni nə gwəŋə nətu, ku yi Zwezi-Kərisə tian tə yiri. ¹² Ba nə ləgə aba níá tə wa, ku biri də, ba gùrì aba, ndə Zwezi-Kərisə nə tiga ba ga gùrì wá. Yá ku tə kùbè biri də, á pìí á twá v nə á bwin á nan tian wa. Ku pìà ku swìn də, á pìn cígá də, Yu nə bwin Zwezi-Kərisə v lɪ tian wa, yá v jə diàn, sə v bwin á də. ¹³ Fuən nə, á mù yà yi ndə tiga nə, á cuna tə yiri. Ku súrí á nə tà Yu làà tə yiri. Yá síún nə, Yu pìí v bwin á mù də Zwezi-Kərisə, v ga fwa pubwanu nə yira. U kwen nə cuna tə mama, v lɪ nə mù də wá pwéré wa. ¹⁴ Ba paa Zwezi-Kərisə dagarv tə yuu wa. Ku mù nə pìn, sagɪ tə, ku nə biri də, nə yi cuna làà, tə cùgù. Yu dàn biri də, sagɪ təntə kùbè ba dèñ jə. Ku yi ndə ba paa ku də Zwezi-Kərisə dagarv tə yuu wa. Yá síún nə, nə cuna tə mama dàn zwè. ¹⁵ Zwezi-Kərisə mù dí diàn wiən tə mama yuu wa, tə yà nə jə diàn ləzoni yuu wa, də wiən tə nə dé pàrì, v ga cùgù tə diàn mama. U ken cavira tə nə luu mama yáá con, ndə ba nə ta kùbè ba dé, ba vaŋa ywəŋə.

(Romə tiàn 14.1-6, 17, Galasi tiàn 4.9-11, 1 Timote 4.1-8)

¹⁶ Ku mù tə yiri, á dànà ká sè á pa liù cəgə aba, ku tə yiri, á nə dé, nə à yèé ku tə yiri, á nə nywìn. Á dànà ká pa liù lɪ dian v tún v pa aba, sə tə ya á cànì á dé, nə à yèé, sə tə ya á sié dian. ¹⁷ Yìèn təntə kùbè ba dèñ jə. Tə yi ndə yiywara nə, ku yà nə biri cígá tə, ka nə biàn. Zwezi-Kərisə tətə nə yi cígá təntə. ¹⁸ Á dànà ká pa làà tútùní də aba ku tə, á nə mɛ, sə á fwa tə yuu wa. Ba mù làà təntə yáá keni càn ba tiàn nə. Ba pìn dun *malɪkɛ nə, ba ga fwa ndə ba cúé ba tiàn tia, ku ga yi kunkun. Ba yáá swìn də, Yu biri ba yoo ku tə, ku ga yi kunkun. Tə sùràn təntə yi fwiə sùràn, tə nə yi yənu, ku nə yi tutv. Ba pubuŋa tə yi ləzwənə pubuŋa. ¹⁹ Ba mù làà təntə də Zwezi-Kərisə kùbè wà duən nə vwe. U mù nə yi nə Yuu-Tiu, yá nə mù də v mù nə vwə duən nə, ndə yuu də yira nə vwə duən nə nətu. Zwezi-Kərisə pìn nə vwa duən nə, nə tuŋa, ndə nandaran yirə yirə nə vwə duən nə, ku

nədu mama ga jə ku tutuŋi. Yá yuu tə nə pɪn diàn tə mama nə, tə ga tuŋa tutuŋi nədu. U mù nə saŋa nəba, u pɪn nə vəli yáá wuuu Yu cwəŋə tə wa.

²⁰ Á yəə də, á twá Zwezi-Kərisə nə, á ti. Ku mù tə yiri, luw wiən, tə nə jə diàn, kúbə ba diàn jə á yuu wa. Bèè dān nə pɪn, á tə ma fwa, ndə á yi luw nə ti aba? Bèè nə pɪn á sè culən tə, ba nə biri aba, ba wú: ²¹ «Á dānà ká ti ku tə, á dānà ká dó ku tə, á dānà ká dwen ku tə yira!» ²² Culən təntə yi tə wulə wiən tə, ba nə ma tuŋa, tə ga cùgà yiri. Tə yi ləzoni cici pubuŋa, ba ma kàri aba. ²³ Wiən təntə yi ndə wubuŋa wiən nə, ba tətə nə zìlí tə ba pubuŋa wa. Ba tətə dān cwí ba tiàn tia, ba ga kəni ba tiàn càn wa. Culən təntə yi ndə tə jə dēn, yá tə ga yi tutu. Tə wàri tə saŋa, sə lià tə li ba tiàn ba pùə yokukwɪnan fira tə wa.

3

Zwezi-Kərisə pɪn aba mu nədun

(Filipə tiàn 3.18-21, 1 Zwan 3.1-3, Efəzə tiàn 5.3-8, 4.17-31)

¹ Yu nə pɪn, á mù də Zwezi-*Kərisə pìi á bwin á nan tian wa də duən. Ku mù tə yiri, á pian Yu sàŋ wiən tə fira ja aba. Mə Zwezi-Kərisə jəə lá nə, Yu jizən*f1* vən nə. ² Á pian á pubuŋa tə ya wiən tə yuu wa, tə nə wulə Yu *sàŋ nə, ka dān ká ya luw wiən yuu wa. ³ Á tɪga də Zwezi-Kərisə. Yá Yu dān twá də Zwezi-Kərisə, u ma pa aba mu nədun tə. Yá mu nədun təntə yi ku sègə Yu con. ⁴ Zwezi-Kərisə nə yi á mu cígá cígá. Dun don nə, u wá pìi u ba u nan nə yíá yuu də u dun tə. Ku máná tə wa, á də wá twá də wá á na dun.

⁵ Ku mù nə pɪn, á dān mɛ, sə á li yokukwɪnan tə á bican wa, tə nə yi luw wiən, á pa tə nyun lá. Tə mù nə yi ka pēn duən vɛɛ vɛɛ, nə à yəə ka tun durən yìèn, nə à yəə ka cwàri, nə à yəə ka pìà pùə fira yokukwɪnan, nə à yəə ka pa lià duən wiən jə yimən tə pa aba. Á nə pɪn lià duən wiən jə

⁸ Síún nà, á dān dūga yìèn tǎntǎ mama. Tǎ mù nà yí lūja, dǎ dūŋí, dǎ wulūŋu, dǎ tijaŋa sùràn, dǎ sufaran, tǎ nà naŋa á nīi wa. ⁹ Á dānà ká kúní kúnkún á kǎ duən nīi nà. Á yí lià tǎ, á nà nan á yá á yua nǎdwan tǎ, dǎ ku tutunɛɛ mama. ¹⁰ Yá síún nà, á dān zua yua nǎdun wa. Yu nà pín aba yua nǎdun tǎntǎ. U mù nà kwen ku mǎŋá mama, sǎ ku ya ndǎ u tǎtǎ mu tǎ nà, sǎ ku pa, á wǎnǐ á lwarí, u nà yí nǎtu zǎnǐ zǎnǐ. ¹¹ Ku mù tǎ yírí, pwíá kùb tǎlǎ lià tǎ, ba nà ní Yu mu nǎdun tǎ, pwérǎ wa. *Zwifǎ-ba dǎ *Gǎrɛkǎ-ba dān jigǎ nǎdu. Lià tǎ, ba nà *gɔŋí bara, dǎ ba tǎ nà ba bara gɔŋí dǎ jigǎ nǎdu. Vǎrǎ tǎ, dǎ lià tǎ, ba yíá nà wǎ purí, dǎ ywǎŋǎ tǎ, dǎ lià tǎ, ba nà tí ba tiàn tǎ mama dān yí nǎdu. Zwezi-Kǎrisǎ cǐcǐ dān nà wulǎ ba mama yuu wa, u ga tūŋa ba liù mama búcan wa.

¹⁶ Zwezi-Kərisə sugu tə də ku yozəŋə tə mama wá ya á pubuŋa wa. Á kàrà duən, sə á kwè duən də wubuŋa tə mama, á nə jə. Á kənə Yu lèè də á waa mama, ʋ pubwanʋ tə yiri. Á nuŋə gwarən, də nuŋi, tə nə bwi Yu nə, də nuŋi tə mama, Yu-**Siŋu* tə nə buri aba. ¹⁷ Won tə mama, á nə fwa, ku nə yi á nii sùràn, nə à yèé á tètùnnán wa, á fwa ku **Yuu-Tiu* Zwezi yiri. Á kənə

nə nyina Yu lèè, ku twá də nə Yuu-Tiu Zwezi.

Kərisə là púlí nə mɛ, sə ku ya nətu

(Efɛzə tìán 5.22-33, 6.1-9, 1 Piyerə 3.1-7, 2.18-25, Titə 2.9-10, 1 Timote 6.1-2)

¹⁸ Á mù kana tə, á liù mama mɛ, sə v sè v barı nii, ndə v nə sè *Yuu-Tiu nii nətu. ¹⁹ Á mù bara tə də, á swóné á kana tə, á dànà ká tun yanyuna də ba.

²⁰ Á mù bìsíná-ba, á zíló á ninə də á nyina nii yoo mama wa. Mə ku mù nə poli nə Yuu-Tiu pùé nə. ²¹ Á mù bia nyina-ba də, á dànà ká fwa, á pa á bia tə lɔ́ɔ zàn, sə ku gwàrì ba jiàn. ²² Á mù ywəŋə tə, á siá là tə, ba nə yè aba tə nii, yoo mama wa, luv ku tə wa. Á dànà ká zílí ba nii ba yía wa cici, sə ku dàn ká ya ndə á pià, sə ba bu á nə. Á tɔ́ɔ ba tùtùnnán tə də á bican mama, á nə zílí Yuu-Tiu tə yiri. ²³ Tutuŋi tə mama á dàn nə tɔ́ɔ, á tɔ́ɔ ku də á bican mama. Á tɔ́ɔ ndə ku yi á tɔ́ɔ á pɔ́n Yuu-Tiu nə, ku tà là nə, á tɔ́ɔ á pɔ́n. ²⁴ Á yèé də, ku yi Yuu-Tiu nə wá ŋwín aba. Á wá na á tori v con. Zwezi-*Kərisə nə yi Yuu-Tiu, yá ku ga yi v mù nə, á tɔ́ɔ á pɔ́n. ²⁵ Liù tə, v nə tɔ́ɔ lwanı, Yuu-Tiu Zwezi-Kərisə wá ŋwín v lwanı tə ŋwírán v pa wá. Yá liù mama bá doni n don də.

4¹ Á mù là tə, á nə yè ywəŋə tə, á jana ba də cígá, ndə ku nə mɛ nətu. Á lie á tìán də, á də jə Yuu-Tiu v nə wulə Yu *sàń nə.

Sagı tə yígúré sùrán

(Efɛzə tìán 6.18-20, 5.14-17)

² Á nə jùnni Yu, sə á ja pínú wuuu, á dànà ká pìí á kə á kwa. Á kənə Yu lèè

də yawala mánjá mama. ³ Á jùná Yu á pa nəba, sə v pa nə na cwəŋə, nə ma swìn v sugu tə, sə nə biri Zwezi-**Kərisə* cígá tə, ka nə sègè, làà nə. Mə ku mù yiri nə, ba vwa nə də banzala. ⁴ Á tə jùná Yu á pa nə, sə à wàní à swìn v sugu tə à biri nəpon nəpon, ndə ku nə mɛ, sə à swìn nətɔ.

⁵ Á pian á ja wubuŋa làà tə, ba nə wà ba waa ken Zwezi-Kərisə nə, yáá con. Yu nə pin aba mánjá nəzəŋu mama, sə á tì ku á ma tun ku tə nə mɛ, sə á tun. ⁶ Á pian á nii sùràn ya ywání, tə ga ja fura mánjá mama. Ba nə bwe aba, sə á yəni á nə mɛ, sə á le nətɔ.

(Efɛzə tián 6.21-22, Filemon 22-25)

⁷ À pià, sə à tun Tiswikə, v nə yi nə nubiswənə, á con. U yi liù tə, v nə tuŋa Zwezi-Kərisə tutuŋi tə də, də pùé nədu. À də v mù mɛ nə tuŋa **Yuu-Tiu* tutuŋi tə duən nə. Mánjá tə, v nə wá bà á con, v wá biri aba won tə mama, à nə wulə ku wa. ⁸ Mə ku mù yiri nə, à tun wá á con, sə v pa á yəni, nə nə yi nətɔ, sə v ga zùrì á bicanì də. ⁹ À tun v mù də Onezimə, v nə yi nə nubiswənə, sə ba kwé duən. Onezimə də yi liù tə, v nə twá Zwezi-Kərisə nə də pùé nədu. U yi á mù wa liù. Ba làà bələ təntə dān wá swìn yoo tə mama, ku nə wulə yəbə, ba biri aba.

¹⁰ Arisətarəkə, à mù də wá nə wulə bān diè tə wa, jùni aba. Marəkə, v nə yi Barənbasə nubiū tə, də jùni aba. À dí yáá à swìn v yoo á con. Mánjá tə, v dān nə twi á con, sə á ja wá zəni. ¹¹ Zwezi, v yiri don nə yi Zwisətisə tə, də jùni aba. Mə ba mù là batwa təntə cici nə yi **Zwifə*-ba, à mù də ba mù nə tuŋa Yu pàrì tutuŋi tə. Ba zùrì à bican zənzən. ¹² Epafərasə, v də nə yi á mù wa liù, jùni aba. U yi Zwezi-Kərisə tutunv tə, v nə jùni Yu zənzən mánjá mama, v pin aba. U lòrì Yu, sə v pa á ya làà tə, Yu yìèn tə nə bɪga á yuu wa, á ga zɪga zəni á ma tuŋa Yu fura, mánjá mama. ¹³ À tətə wàá à biri nətɔ tə, v nə tuŋa zənzən, v pin á mù, də Lawodise tián, də Yerapolisə tián nə.

¹⁴ Nə nubiswənə dumuturu Likə də Demasə də jùni aba.

¹⁵ Á jùná Kərisə làà tə mama, ba nə wulə Lawodise nə á pa nə. Á jùná

Ninfa də Kərisə lìa tə, ba nə yàá jəri duən v diè wa, á pa nə. ¹⁶ Máná tə, á nə kàrì sagı ku tə, á zwè, sə á pa ku va ku pa Lawodise Kərisə lìa púlí tə də nə, sə ba də kàrì ku. Ku kwa nə, sə á də kúbù lwàń, á jon à sagı tə don tə Lawodise tián con, á kàrì. ¹⁷ Á swìán Arəswipə con, sə v kə v yía lá, v tun tutuŋı tə, Yuu-Tiu nə pın wá, v pa ku zwè.

¹⁸ À mò Polə tətə nə púpúní bwálí ku tə wa də à jun à ma jùnì aba. Á dānà ká swèé də, ba vwa nə də banzala. Yu nə wá fwa pubwanu á yıra.